

FALSAFAH DAN KEBUDAYAAN

Penjajahan Manusia oleh Manusia

Kekuatan bangsa kita, sebenarnya terletak di dalam imannya yang mendalam dan keyakinannya akan perintah Allah '*azza wa jalla*' yang mengharamkan supaya jangan seseorang Islam membiarkan dirinya dan hak pusakanya dijajah. Kepercayaan yang demikian mendarah daging pada diri bangsa kita. Memang tidak ada dan tidak boleh, penjajahan dan keimanan itu dikumpulkan di dalam jiwa yang satu. Roh yang beriman itu ialah roh yang menentang tiap-tiap kezaliman dan penjajahan.

Dalam rangkaian kepercayaan bangsa kita, mereka belum merasa penuh memeluk dan menurut perintah-perintah Tuhan, belum sempurna agama mereka, apabila mereka membiarkan dirinya dan bangsanya dijajah oleh lain golongan atau lain bangsa. Oleh kerana agama yang dipeluknya itu ialah agama yang mengajar supaya menolak tiap-tiap kezaliman dan tindasan.

Pada hakikatnya agama Islam itu merupakan suatu pemberontakan dalam menghapuskan dan menentang tiap-tiap kezaliman dan penindasan oleh manusia terhadap manusia, baik yang berbentuk dan bernama kapitalisme, imperialisme atau kolonialisme, terserah kepada nama yang hendak diberikan. Itulah pula semangat kemerdekaan yang hidup, dan telah dihidupkan serta dibakar dalam jiwa kaum Muslimin.

Bangsa yang lemah lembut

Dunia pada masa itu takjub dan hairan melihat kita. Bangsa kita pada waktu itu merupakan suatu bangsa lain daripada yang disangka pada mulanya. Bukankah mereka menamakan bangsa kita: Bangsa yang lemah lembut dan halus budinya di atas dunia ini? Halus budi dengan pengertian suka menurut dan diperintah oleh pihak yang memerintah.

Akan tetapi bangsa yang lemah lembut dan berbudi halus ini, pada satu saat mengalami perubahan yang hebat.

Kalau pada mulanya diibaratkan sebagai seekor kambing yang menurut sahaja maka pada saat itu mereka menjelma menjadi harimau yang garang. Mereka telah dapat menunjukkan kegagahan dan keberanian yang menakjubkan. Rupanya bangsa kita itu menanam di dalam kalbu hatinya khazanah keberanian yang terpendam, yang meletus pada saatnya.

Panggilan *Allāhu Akbar*

Kita mendengar panggilan dan seruan di radio untuk mengerahkan tenaga yang terpendam itu. Berjuta-juta bangsa Indonesia, lelaki dan perempuan, tua dan muda, masih teringat, berdengung di telinganya panggilan Bung Tomo dari Radio Surabaya. Ia memanggil alim ulama dan kiyai-kiyai di seluruh Indonesia dengan panggilan

"Allāhu

Akbar”. Ia bukan sahaja berani tampil ke hadapan memimpin perjuangan, akan tetapi ia mempunyai suatu pengetahuan yang kerap kali orang tidak mengetahuinya, iaitu tentang “di mana terletak kunci bagi kekuatan bangsanya ini.”. Dibukanya kunci hati umat yang banyak itu dengan kalimah “*Allāhu Akbar*”.

Tahu dia mencari temannya. Tahu dia siapa-siapa teman-temannya yang dapat membangunkan tenaga dan menggelorakannya. Dicarinya teman itu di antara pemimpin-pemimpin rohani yang tidak pernah kelihatan namanya dalam surat khabar-surat khabar dan tidak pula pernah tercantum dalam daftar parti politik. Dicarinya pemimpin-pemimpin rohani itu yang bernama alim ulama dan kiyai-kiyai di desa-desa. Dipanggilnya dan diserunya: “Mari kita sama membuka kunci hati umat dengan kalimah *Allāhu Akbar*”. Dengan demikian bergeloralah dan membanjiri segala tenaga yang dikehendaki, begitu pula alat-alat yang diperlukan.

Pertunjuk Suci

Nyatalah seruan suci yang demikian, menjadi pertunjuk bagi mereka. Nyatalah bagi kita bahawa bangsa kita ini ada satu jentera yang menggerakkan tenaga untuk menghadapi bencana-bencana dari luar. Dan jentera ini bukan semata-mata jentera yang boleh bergerak untuk menghancurkan musuh yang hendak menindas sahaja, tetapi juga sanggup mengeluarkan tenaga yang besar, yang jikalau kita menyalurkannya akan dapat membangun dan mengisi negara kita yang sudah kita capai ini, dan dapat mengetahui bagaimana menggunakan kekuatan yang besar itu. Celakalah negara kita, jikalau orang tidak pandai

memakai tenaga itu sehingga ia meletus jadi alat pembakar. Rugilah bangsa kita kalau kekuatan dan tenaga yang besar ini, dibiarkan dan tidak digunakan sama sekali.

Pada saat ini kita sedang mencari-cari jalan, dan pada saat ini kita harus menjawab pertanyaan: “Hendak kita apakan kemerdekaan kita ini? Hendak kita isi dengan apa negara kita ini? Bagaimana mengisi kemerdekaan itu?”

(Dari buah kalam al-Ustādh Haji Muhammad Natsir, pemimpin Islam yang terkenal).

BUKU2 RUMI

*Pendidikan	\$1.20
*Akhlik	1.20
*Surat Menyurat	1.50
*Jalan ka-Kota Baharu	1.50
Penglipor	1.50
Panduan Pekedai2 Kechil	0.70
Balek Dari medan Perjuangan	1.00
Sejarah Perak Dahulu dan Sekarang	2.00
Keris Sempena Riau	1.00
Tinjauan Sastera Tanah Ayer	1.50
Sisa Neraka Dunia	1.00

Buku A.BC (buku bacaan) di-dalam-nya tiga warna (sedang di-chitak).

*Kalau memesan hendak-lah sebutkan naskhah Rumi. Kerana buku ini ada naskhah Jawi-nya